



Kabarett „Sachsenmeyer & Co.“
09224 Chemnitz
Feenweg 11

Hauptspielstätte:
Kabarett-Kiste (im Hedwigshof)
An der Markthalle 8
09111 Chemnitz

Bestell-Telefon: 0371 - 694 77 11
www.sachsenmeyer-kabarett.de
e-Mail: sachsenmeyer@t-online.de

35. Kalenderwoche – ab 29. August 2010

Das is, wies is!

Isch weeiß jezde nisch, zu welschor Sorde Sie geheern dun... - also, isch meene, wenn Sie Audo fahrn dun! Geheern Sie dann zu de Rindvieschor odor zu de Idjodn?

Also, jezde ma aus meinor Sischn gesähn!

Dass Sie nadihrlich aus Ihror Sischn kee Rindvieh sinn un ooch kee Idjod, das is ja klar! Abor ehm aus meinor Sischn...?

Obwohl - es dud manschma Momende gähm, wo isch ooch ma heimlich zu mir sachn muss, dass isch selbor e Rindvieh gewähns bin... - zum Beischbiel wenn isch beim Riggwärdsfahrn een Hydrand ieborsähn hab... odor wenn isch in dor dreißisch-Zone mid siebzisch geblidzd wordn bin... odor wenn isch an dor Ambl eingeniggd bin un de Grienfase gladd vorbennd hädde, wenn se misch nisch wachgehuhbd hädnd... - die Idjodn!

Jednfalls - wenn isch im Audo unnorweschs bin, dann sinn die annorn, die ooch unnorweeschs sinn, endwedor Rindviechor odor Idjodn! Da kann isch werglich nischd davor! Das is wies is! Da gibds nischd scheenzuredn! Meine Gudste dud da sogahr manschma noch weidor gehn un sachd - Gnallooche, alles Gnalloochn!

Nascha, Fraun sinn ofd sähr gridisch geschniebor annre Midmänschn. Wenn isch da jezde bloß ma dran denkn du, wie die manschma mid mir gridisch is! Hohoho!

Das heeßd, wenn mir Audofahrn dun... un wenn isch fahrn du... - da isse eischendlich immor mid mir reladief sollidahrish! Nascha, mir sidzn ja dann ooch sozusachn in eem Bood! Obwohl nadiehrlich unsor Audo kee Bood is, sondorn e Ford. Heeßd iebischens Ignaz dor Dridde.

Nee, abor nochma vonweeschn meinor Gudstn... se wird bloß immor eschd beese mid mir, wenn isch bei Reeschn aus reenor Schbarsamgeid nisch gleisch off wischwaschwischwasch schaldn due, sondorn bloß off wischbausewischbausewisch. Se sachd, guhde Sischd is erschde Bflischd! Abor sonsd... meisdens sinn mir uns einisch iebor die annorn, die uns beim Fahrn belädischn dun.

Besonders läsdich sinn ja ooch die, die so dahinzuggl'n dun... so bei fuffzisch gladd fuffzisch!..., als wie wennse Urlaub ham. Odor die, die bevor se in eenor Reschdkurve abbieschn dun, erschdma een Schdehvorsuch machn. Da denksde schon, die wolln ausschdeischn un ihrn Schdraßnfloh um de Kurve numhehm!

Odor dann die, die von hindn drängeln dun. Die ganz eilischn! Die häng dir fasd im Gofforraum un dun so, als wie wenn de Schdraße eene Rennschdregge sein däde! Da habsch jedesma Lusd, eene Vollbremsung hinzuleeschn! Abor de greeßdn Idjodn sinn dann die, wenn de Golonne fahrn mussd off dor Landschdraße, die dann aus dor driddn odor findn Bosidsjohn anfang, de Golonne zu ieborholn. Isch hädde ja ooch in dor näschsdn Sekunde zum Ieborholn ansedzn wolln! Abor nee... da kommd eenor von ganz hindn... un meisdens sinns BMW`s! Das is wies is! Un wenn Sie so eenor sein solldn... äh, dann dun Sie eindeidisch zu dähr een odor dähr annorn Sorde geheern!

Eduard Sachsenmeyer